

von Wulf Wager

Null Prozent Quote!



Mei Vaddr hot emmer den altwürttembergisch-pietistische Spruch uf de Lippa ghet: "Wenn 's am Scheenscha isch, soll mr uffhöra!" Des han in domols net recht vrstanda, schließlich hätt 's fir mi wenn 's schee gwää ischt, emmr so weiter ganga kenna. Aber dia Lebenserfahrung zoigt zom Beispiel beim Feira, dass' a Stond später au et andersch ischt, abr dr näggschde Morga drfier om so schlemmer. Leider hot

sich des onser Nirdenger Landsma' Harald Schmidt et hendr d' Ohra gschriebe ghet. Der hot doch scho soviel vrdient, dass 'r koin Fenger me kromm macha miasst. Noi, nochdem en bei der ARD scho nemme viel hend seha wella, isch'r zu SKY, dem Kultursender der Nation. Dort hot'r jetzt sei absolute Traumquote erreicht: 0,00 Prozent. Net amol 5000 Zuschauer hend den säha wella. Oh, liabs Hergöttle von Biberach, hend di d' Mugga verschissa. I fend des schlemm, wenn dia einschtige Ikona oifach et wissat, wann's am beschta isch aufzomhaira. Guggat amol da Biolek oder da Loriot a. Dia hend ufghört, wo mr se no richtig vrmisst hot.

Em Gottschalk wirts jetzt bald gleich ganga wia em Harald Schmidt. Wer sich scho rondr lässt, so en Dreck wie "Supertalent" mit am Dieter Bohlen zamma zom moderiera, der ghert sowieso oagschbitzt en Grondserzboda gschla. I hätt en eigentlich für gscheidr ghalta. Denn, wenn dr Bohlen so lang wär, wia domm, no kennt 'r aus dr Dachrenn' saufa!

Bis näggschd Woch

Ihr

Wulf Wager